

Powšitkowne WOZJEWJENJA

njedźelu, 24. meje 2020

Wusyłanja Božich službow live

Serbskorěčnu Božu mšu tutu njedźelu, 24. meje, móža wěriwi znowa jako livestream w interneće scěhować. Dopoldnja we 8.30 hodž. přenjese so wona z Kulowskeje cyrkwe. Tak budže to tež swjatkwonničku, 31. meje. Z Ralbic wusyła so Boža mša njedźelu tohorunja we 8.30 hodž. přez livestream, ale jeničce za słuchanje. Linki k wusyłanjam su stajnje aktualnje na internetowej stronje www.posol.de podate. Swjatkwonu pónđzelu, 1. junija, budže MDR Serbski rozhłós Božu mšu w 9 hodž. z Róžeńčanskeje cyrkwe wusyłać.

Mejski nyšpor TCM

Towarstwo Cyrila a Metoda z.t. (TCM) přeprašuje na mejski nyšpor, kotryž budže tutu njedźelu, 24. meje, w 17 hodž. w Róžeńčanskej swjatnicy a kotryž Kira Hrjehorjec z Noweje Wjeski hudźbnje wobrubu. Na nim so na 100. narodniny swjateho Jana Pawoła II. nawjaza. Zwuk přenjese so tež zwonka Božeho domu, hdžež budu přidatne městna k sedženju přihotowane, dokelž su městna koronoweje krizy dla w cyrkwi wobmjezowane. Radžomne je, sej stólčk sobu přinjesć.

Wustajeńca wo jutrach w Serbach

Nałožki, kotrež so wokoło jutrow w Hornjej a Delnej Łužicy, w katolskich kaž tež ewangelskich kónčinach pěstuja, předstaja wustajeńca „Jutry w Serbach“ w Budyskim Serbskim muzeju. Ju wobohaćeja twórby serbskeho wumělca Marija Ošiki, na přikład „Křižowy puć“. Wosebita wustajeńca wostanje hač do 23. awgusta přistupna.

Pytaja hladanskeho nawodu

Hornjołužiski zwjazk Carity z.t. pyta za swoju socialnu staciju Budyšin-Kamjenc noweho hladanskeho nawodu. Tale stacija zastaruje z třomi decentralnymi teamami něhdže 400 pacientow. Dokładne wupisanje je pod www.posol.de wozjewjene.

Telefoniske poradžowanje

Hornjołužiski zwjazk Carity z.t. poskičuje w koronowej krizy telefoniske poradžowanje, ale tež prosće rozmołwy z tymi, kiž maja žadosć za tym, z někim so rozmołweć móc. Sobudželačerjo Carity su wot pónđzele do pjatka wot 8 do 16 hodž. pod telefonowym čisłom (0 35 91) 49 82 20, ale tež pod mailowej adresu beratung@caritas-oberlausitz.de docpějomi.